

ձիօսին նվիրված էր օձը՝ վիշապը ստորերկրյա, անդրաշխարհային, մեռյալ-  
ների աշխարհի կենդանի՝ animal chthonien: Թվում է, թե Վահագնի երկրորդ  
անունը եղև է պարզորեն Աստված, համապատասխան Սաբաձիօս-Ատախին:

Հայկական ժողովրդական տոները բացատրելիս մեզ թվում է, թե ավելի  
հիմնավորված պիտի համարվեն նրանց հետ զուգորդված սովորությունների  
այն մեկնաբանությունները, որոնց հիմք է ծառայում ոչ թե պարսկական-զրա-  
դաշտական, դուալիստական մտածողությունը, այլ փոքրասիական մեռնող և  
հարություն առնող բնության պաշտամունքից բխող աշխարհըմբռնումը<sup>8</sup>:

### ԺՈՂՈՎՐԴԱԿԱՆ ՏՈՆԵՐ<sup>9</sup>

Նոր տարի: Զանգեզուրի հայր Նոր տարին սկսում էր ոչ թե հունվարի մե-  
կին, քաղաքացիական Նոր տարու հետ, որը նա ոչ մի բանով չէր նշում, դա  
նույնիսկ պատ օր էր, այլ Նավասարդի տոնով, որը սովորաբար կատարում էր  
նոյեմբերի կեսերին, 10—20-ը կիրակի օրը, Նախրաթօղին: Այդպես էր և կեո-  
նային Ղարաբաղում, Մեղրիում, Ագուլիսում և մեր ունեցած տեղեկություն-  
ներին նայելով, մինչև Սալմաստ, որտեղ տոնվում էր նոյեմբերի 13-ին մոտ,  
գուցե նաև համատարածաբար մինչև Ալաշկերտ, որտեղ նույնպես այդ ամսին  
էր սկսվում Նոր տարին: Հնում Նավասարդը տոնվում էր օգոստոսի 11—սեպ-  
տեմբերի 9-ը: Հայաբնակ արևմտյան վայրերում Նավասարդի տոնակատա-  
րությունն անծանոթ էր: Այնտեղ Կաղանդն էր տոնվում հունվարի մեկին իր  
հատուկ սովորություններով: Զանգեզուրում նախրապանը և առհասարակ տա-  
նու ծառայողները վարձվում էին մինչև այդ օրը: Նախրապանն այդ օրն ան-  
պատճառ պիտի իր տանը մնար և հագներ իր ամենամաքուր շորերը: Մյուս  
տոներին նա կարող էր նաև դուրսը, դաշտում մնալ: Դրանով շեշտվում էր, որ  
նրա աշխատանքների մի շրջանը վերջացած էր: Նույնպես այդ օրը վերջ էր  
գրվում բոլոր անձնական խոովություններին: Իրար հետ խոովածներին հաշ-  
տեցնում էին և նրանց մեջ եղած դժգոհությունների բոլոր առիթները համար-  
վում էին վերացած: Այսպիսով՝ նոր տարին պիտի սկսվեր ընդհանուր հաշ-  
տությունամբ և հին հաշիվների վերացմամբ, որով ապահովվեր խաղաղություն  
ամբողջ Նոր տարվա համար:

Բնորոշ է, որ Նավասարդ բառը ըստ լեզվագետների բացատրության, ունի  
իրանական ծագում: Նրանք<sup>10</sup> այդ բառը համարում են հունանիշ navasard  
բառին, որը կազմված է nava-նոր (զենդ.) և sard-տարի արմատներից:

<sup>8</sup> Այս տողերը արդեն գրված էին, երբ հնարավորություն ունեցա ծանոթանալու «Հայրե-  
նիք» ամսագրի, Բոստոն, 1925—26, № 1 և հաջորդ համարներում Նիկ. Ադոնցի լույս ընծայած  
հոդվածաշարի հետ՝ «Հին Հայաստանի աշխարհայացքը» վերնագրի տակ: Հեղինակը մատնանշում  
է Ատախ-Կիրիլայի պաշտամունքի առկայությունը հայկական հեթանոսական հավատալիքների  
մեջ, հաստատելով իր միտքը մանավանդ Արայի և Շամիրամի առասպելի վերլուծումով:  
Ն. Ադոնցը պատում է նաև իր՝ «Եկեղեցու սուրբերն ու եկեղեցական տօները» պատրաստի աշխա-  
տության տպագրության: Ինձ հայտնի չէ՝ արդյոք նրա այս վերջին հետազոտությունը որևէ տեղ  
լույս է տեսել: Ակադեմիկոս Գր. Ղափանցյանն էլ՝ Ն. Ադոնցից անկախ զբաղվելով Արայի և  
Շամիրամի առասպելի վերլուծումով՝ համեմատում է այդ առասպելը Քամուղի պաշտամունքի  
հետ, որը նույնպես շաղկապված է մեռնող և հարություն առնող աստվածների մասին Միջագետ-  
քում տարածված ավանդությունների հետ:

<sup>9</sup> Հմմտ. Լալայեան Ե., Սիսիան, էջ 149—160, Զանգեզուր, էջ 106—112:

<sup>10</sup> Հ. Անառեան, Հայերէն արմատ. բառ., հ. V, էջ 66: